

# Article 1

# Ekonomiks

## ANG EKONOMIKS BILANG ISANG AGHAM

Ang agribusiness ay maaaring isang gawain na kaaaya-aya tulad ng pagtatrabaho sa ibang bansa. Maaaring mas higit pang gantimpala ang natatamo sa gawain na ito tulad ng patotoo ng dating Overseas Filipino Worker (OFW). Si Roy Angcaco ay nagpapasalamat na nakabalik siya sa kaniyang bayan sa Carmen, North Cotabato. Noong taong 2000, siya ay tumatanggap ng buwanang sahod na P40,000. Ito ay mas malaki kaysa sa tinatanggap niyang P12,000 noong isa siyang truck driver ng kompanya ng furniture sa Saudi Arabia. Siya ay nagtapos ng kursong bokasyonal na automobile at pagkatapos ng graduation ay nagtungo siya sa Saudi Arabia bilang driver ng furniture sa loob ng ilang taon. Pagkalipas ng ilang taon, isang Korean ang nagbukas ng restaurant at siya ay kinuha bilang driver na may buwanang sahod na P20,000.



Ang trabaho niya ay maghatid ng mga in-order na pagkain sa restaurant. Kapag wala siyang ihahatid na pagkain, tumutulong siya sa gawain sa kusina kaya siya ay natutong magluto ng iba't ibang putahe tulad ng Chinese, Korean, at Japanese. Mahusay siyang magluto ng pagkaing Japanese kaya nakuha siyang head chef ng isang Japanese restaurant na may buwanang sahod na P40,000. Siya ay matipid at nakapag-impok ng malaking bahagi ng kaniyang kinita. Bunga nito, siya ay nakabili ng 12 ektarya ng lupa sa halagang P180,000 nang siya ay bumalik sa kaniyang bayan noong taong 2000, at nagsimula ng pagsasaka. Sa ngayon, si Ginoong Angcaco ay nagtatanim ng mais at ibang gawain tulad ng pangangalakal at pagpapautang sa ibang magsasaka na nagtatanim ng mais. Pinasok na rin niya ang pagtatanim ng ibang produkto tulad ng bigas, sugarcane, at rubber trees.

Hindi nagkamali ng pagdedesisyon si Ginoong Angcaco na mas pinili ang pagpasok sa agribusiness kaysa sa maging OFW at magtrabaho sa isang restaurant. Panulat ni Zac B. Sarian Agriculture, May 2011



Sagutin ang mga tanong sa inyong kuwaderno.

1. Ano ang konsepto na binibigyang-diin ng salaysay?
2. Paano nakinabang si Ginoong Angcaco sa kaniyang pagpili?
3. Ano ang opportunity cost ni Ginoong Angcaco?
4. Paano pinaunlad ni Ginoong Angcaco ang kaniyang agribusiness?
5. Anong aral sa buhay ang natutuhan mo sa kuwento ng buhay ni Ginoong Angcaco?